

Surat khabar: Utusan Borneo
Hari/Tarikh: 12/11/2012
Muka surat: 14

Tajuk : UNIMAS turut menyumbang kepada pelancongan domestik

Tempatan

UNIMAS turut menyumbang kepada pelancongan domestik

KUCHING: Universiti Malaysia Sarawak (UNIMAS) turut menyumbang kepada pelancongan domestik sekali gus menjana ekonomi negeri.

Menteri Muda Pelancongan Datuk Talib Zulpilip berkata, pelancongan domestik Sarawak telah mendapat manfaat daripada UNIMAS yang mempunyai ribuan pelajar dari negeri lain.

“Pelajar-pelajar ini mengikuti mengikuti pelbagai kursus di fakulti yang terdapat di kampus Kota Samarahan.

“Ketibaan pelajar dari luar Sarawak merupakan satu petanda baik untuk pembangunan ekonomi terutamanya di Kota Samarahan kerana ia menyediakan peluang yang baik bagi penduduk tempatan menambah pendapatan mereka,” katanya berucap pada Majlis UNIMAS Bersama Masyarakat di Kompleks Pelancongan Sarawak di sini, kelmarin.

Beliau berkata, dengan reputasi sebagai institusi pengajian tinggi awam pertama, UNIMAS terus menarik kemasukan pelancong domestik dan asing di pelbagai program akademik

mereka.

Talib pada masa yang sama memuji usaha UNIMAS kerana sudi berkongsi dengan masyarakat mengenai pencapaian mereka.

Menurut beliau, universiti yang akan menyambut ulang tahun ke-20 tahun ini telah menunjukkan contoh baik kepada yang lain bagaimana institusi pengajian tinggi memainkan peranan kepada pembangunan masyarakat.

Terdahulu Timbalan Naib Canselor (Hal Ehwal Pelajar dan Alumni) UNIMAS Profesor Mohd Fadzil Abdul Rahman dalam ucapannya berkata, program sehari itu menyasarkan untuk mewujudkan kesedaran dan memupuk minat di kalangan masyarakat tentang penubuhan UNIMAS.

Menurut beliau, pencapaian masa lalu dan kini UNIMAS adalah hasil dedikasi pelajar, kakitangannya dan masyarakat secara keseluruhan.

Pada majlis itu, UNIMAS turut menyampaikan sumbangan RM2,000 masing-masing kepada Yayasan Salam Malaysia, Sarawak AIDS Concern Society, Home of Hospices dan Sarawak Hum Nam Siang Tng.